



L'illustre barbe D. C. : en vers burlesques.

<https://hdl.handle.net/1874/362720>

L'ILLVSTRE
 BARBE
 D. C.
 En vers Burlesques.



LILLVSTRE
BARBE
D. C.

En vers Burlesques.

LOING d'icy discours serieux
Vous n'estes bons que pour les vieux,
Parlons en des termes Burlesques
Comme tous ces Autheurs gratesques
Qui font treve à tous les discours
Où l'on ne parle que d'amours.
Je veux parler d'un ton affable,
Non pas d'une inutile fable,
Mais d'une Barbe au beau menton
Qui comme le poil au mouton
Depuis six semaines est crüe
Espaisse, longue, belle & drüe
A cét illustre Conquerant
Qu'on appelle le Luiferrant.

Ce grand Guerrier que rien n'estonne,
 Ce valeureux fils de Bellone
 Pour paroistre homme de Conseil
 A voulu paroistre plus vieil.
 Tous ceux qui sçauoient son courage
 Disoient qu'il estoit trop volage,
 Qu'il ressenoit le mois de May,
 Que son timbre estoit trop gay:
 Sçachant qu'on parloit de la sorte,
 Morbleu dit-il le Diable emporte
 Si ie ne les feray mentir,
 L'on me verra laisser venir
 Vne barbe si venerable
 Que ie paroistray plus capable
 Qu'un General des Capucins
 Ou bien des petits Augustins.
 Les Soldats voudront mieux me suiure,
 Et diront que ie sçay bien mieux viure
 Que ie n'ay pas fait cy-deuant,
 Quand la teste pleine de vent
 Y ay perdu les plus braues hommes
 Qui fussent au siecle où nous sommes.
 En effet il a si bien fait
 Que sa barbe est crue en effet,
 Et qu'il paroist le plus sage homme
 Qui soit de Paris iusqu'à Rome,
 Et l'on le prend à S. Germain
 Pour mettre de l'eau dans son vin

Et temperer ce grand courage
Qui ne craignoit aucun orage.
Dieu vueille qu'il deuienne meur
Pour nostre bien & son honneur,
Car par ma foy si ce temps dure
Le crains quelque triste auanture.
Mais que mon presage soit faux,
Et que pour soulager nos maux
Deuant la fin de la semaine
Nous ayons vne paix certaine.
L'auteur de ces Burlesques vers
Auoit l'esprit tout de trauers
Ainsi que cette Barbe est faite,
Le ne dis pas à l'escopette,
Mais il auoit tout le menton
Comme la queue d'un mouton.

FIN.